



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim

tir_yimyim

tir yimyim TAPAK 8

Amit Shah-i jembiba o anema Dalit organisations-i longkak aiter

Mumbai City FC U13 squad atema Assam nungi jakzüker Dishant shimogo

VOL. XXII ISSUE NO. 73 (ADOK 73) DIMAPUR KÜPTOKNÜ (SATURDAY) LUCHII (DECEMBER) 21, 2024 ₹ 5.00

Thahekhu tatalokba atema Co-ordination Committee and Action Committee tentetogo

Dimapur, December 20, 2024 (TYO): December 17 aonung Dimapur kübok Thahekhu yimtsüng nung lanurtem züka merenshir ajak aputsü atema Dimapur Police nem ghonda 24 züngzüksüogo.

Dimapur Rengma Youth Organisation (DRYO)-i Hokolbarnü Dimapur nung amenoka aliba lanur teloktem den senden ka ayonga amendang Co-ordination Committee and Action Committee ka tentetogo.

Hotel Saramati nung osangbener den jembidang DRYO advisor Aga Rengma-i 'coordination and action committee' tentetba osang lemsatop.

Iba committee nung Tenyimi Youth Organisation president-i convenor aser Zeliang Youth Organisation Dimapur president-i co-convenor ama inyaksü shimogo.

Parnoki Dimapur Police dang ghonda 24 tsüngda tai tonglokja alir nisung asem aputsü aser DMC councilor-i menden nungi alutsü takhangba agütsüogo.

Naga lanurtem züka merenshibaji Michael Yephthomi'er nija kidang liasü aser pa kinungtsü ya DMC councilor ka lir ta lanur teloktemi ashi.

Parnokisa ceasefire ground rules & regulations yanglushitsü takhangba agütsü.

Tang ya Christmas mongpu lir anungji police-i security magütsütetra aser sorkari tanü ajurua aliba khurettem mekoktetra 'Black Christmas' sangdonga amongtsü ta Dimapur nung Naga lanurtemi metetdaksüogo.

Iba 'coordination and action committee' ya lisopur lanur ajaki shilem agia tentetogo ta parnokisa ashi.

Kacharigaon (Phevima) Village telok balalai aitsür:
Kacharigaon (Phevima) Village Council, Youth Organization aser Students' Union-i December 17 nü Naga lanur asem dak züka merenshibaji aser reshikangshiba aitsüba metetdaksüogo.

AKM office benjung sodi agitsü

Dimapur, December 20, 2024 (TYO): Ao Kaketshir Mungdang (AKM)-i Christmas aser and New Year sodi agitsü metetdaksüogo.

AKM-isa Christmas salem aser Khrista dak amanger ajak den tepela anogotem amongtsü moatsür ta ashi.

Lanur asem rongnung anabo ozü yimtsüng nung senso tajungtem lir aser parnok prangpong agi tuitur pur oa züka merenshibaji atema kanga aoksar, temulung raksar aser jashir ta Kacharigaon (Phevima) teloktemi metetdaksü.

Par asem rongnung tanubur ka shiba kaketshir ka lir pai taochi sayutsü mepishi saka pa luja mezüngmeshia azükba osang angashia süngmanger. Ozüng amertemi iba mapa inyaker ajak aputsü aser tarutsü nung Naga nung reshikangshi masütsü atema National Security Act kübok ken o benoktsü akhanger ta parnokisa ashi.

Külen, Dimapur Rengma Students' Union aser Tenyimi Students' Union Dimapur (TSUD)-ia Dimapur Police dang ghonda 24 tsüngda tai tongloka alir tanüngba nisung asem aputsü takhangba agütsüogo.

Police-i züngzükja aliba mapang tsüngda tanüngba nisungtem pua marura onoki kechi junger ta bilemdir inyaksü ta kaketshir teloktemi ashi.

Telungpurtemi züka merenshibaji lanur asem rongnung kabo kaketshir ka lir aser 'Naga national workers'-i pei tasodak nübertem nem timtem agütsüba aser merenshibaji agi laktetogo ta kaketshirtemi ashi.

"Police-i tang pua alirtem rongnung Naga yimten telok züngsemtem dena lir aser iba telok ya India sorkar den ceasefire agreement nung lir. Iba ceasefire agreement ajanga parnokisa sensotem dak prangpong agi tuitur merenshibaji aser amokmerentsü temeten agüja lir asü?" ta kaketshirtemisa asüngdangogo.

Parnokisa police dang prangpong-injangtem aputsü aser aibelenertem indang maitsü yimjak nung metetdaksütsü takhangba agütsüogo.

Iba lendong nung takoksa angurtem dak tarutsü nung langka danga atalokra, iba tebilemstü khuretji tai tonglokja alirtemi abentsü ta kaketshirtemisa ashi.

December 23, 2024 nungi January 6, 2025 tashi office shibangtsü anungji iba mapang Onenpong (Vice-President) 7005740523 aser Satemmongba (General Secretary) 7005629385 den tongteprateptsü metetdaksür ta AKM-isa metetdaksüogo.

Amit Shah mapa nungi anentsü takhangba agüja lungkak ait



Hokolbarnü Congress Bhavan, Kohima nung Nagaland Pradesh Congress Committee (NPCC),- i anir lungkak aitag agiba noksa ka angur.

Dimapur, December 20, 2024 (TYO): Nagaland Pradesh Congress Committee (NPCC)-i December 20, 2024 nü Congress Bhavan nung lungkak aitba sentong ka ayonga agiogo.

Tanep 11:00 ako nung NPCC den kongsang balala aser Kohima District Congress Committee (KDCC) züngsemtemi iba sentong nung shilem agi.

Union Home Minister Amit Shah-i ashishitep onük jembiba aser mapa inyakba atema mapa nungi anenang ta takhangba agüja linük ajungalen Congress-i lungkak aitogo.

Union Home Minister-i Indian Constitution tebu Dr. B.R. Ambedkar mezüngmeshia jembiba aitsür ta Working President, NPCC Khriedi Theunuo-i ashi.

Ibala onük ajanga asen democracy tamendakdak raksatsür anungji pai iba tebilemstü khuret abentsüla ta

Theunuo-isa ashi. PCC Secretary (Protocol) Akuonuo Miachieo-ia iba onük jembiba aitsü aser Home Minister mapa nungi anentsü takhangba agütsü.

Home Minister-i inyakba aser jembiba ajanga asen Constitution nung lateta aliba magizükba sayur ta laisa ashi.

Tanü lungkak aitba sentong nungsa Assam Police-i Guwahati nung Assam Youth Congress züngsem Mridul Islam tepsetba aser Youth Congress lennirtem Zubair Anam o Uday Bhanu Chib nung apuba aitsüogo.

Nagaland Pradesh Youth Congress (NPYC) President Lima Lemtur-i iba tatalokba aitsü. Iba ya tashi alia benshiba aser democratic tangatetba anema inyakba lir ta pai ashi.

MP (Rajya Sabha) S Phangnon Konyak-i Congress lennir aser Leader of Opposition Rahul Gandhi anema tiyazü nung

tai tongloksüba aitsür ta NPCC-isa metetdaksü.

Home Minister-i mapa nungi manen tashi onoki lungkak aitba manentsü aser linük temzüng den democratic tangatetbatem kümzüka ayutsü ta NPCC-isa metetdaksüogo.

Hokolbarnü Opposition-i Union Home minister Amit Shah anema lungkak aitba manenba agi Lok Sabha aser Rajya Sabha session magiteti tembangogo.

Amit Shah-i Dr BR Ambedkar indang olen jembiba atema ruling aser opposition tsüngda mepetmesü adoka Parliament session tembangogo.

Tanü INDIA bloc züngsemtemi Vijay Chowk nungi Parliament tashi lungkak aita jaja. Iba ya masü dang BJP züngsemtemi Makar Dwar nung lungkak aita liasü.

Opposition-i Ambedkar posters amer Amit Shah dang mapa nungi anentsü takhangba agütsü.

Mahila Congress-i MP Phangnon Konyak aitsür

Dimapur, December 20, 2024 (TYO): Rajya Sabha MP S Phangnon Konyak-i ozü party lennir aser Leader of Opposition Rahul Gandhi dak tai tongloksüba aitsür ta Nagaland Pradesh Mahila Congress

Committee-i tanga sangdong ka nung ashi.

MP Phangnon-i tiyazü nung Rahul Gandhi tenüng menüksütsü aser tarak kettsütsü meranger ta NPMCC President Odikumla-i ashi.

Ozü lennir anema tiyazü ken o benokba süoki ia bilemer aser Rajya Sabha MP dang bilemdanger ang aser kuli tejangja yur ang tai tongloksütsü ayongzüker NPMCC President-isa ashi.

BJP Nagaland State-i Rahul Gandhi aitsür

Dimapur, December 20, 2024 (TYO): Lok Sabha nung Leader of Opposition Rahul Gandhi-i Rajya Sabha MP, S. Phangnon Konyak dak tesempatsü mapa inyakba khukhua aitsür ta Bharatiya Janata Party, Nagaland State-i metetdaksü.

"Iba inyakyim ya la dang masü saka Nagaland nung alirtem mezüngmeshiba lir. Iba ama tesempatsü mapa ya Parliamentary inyakyim den meputep aser linük nung jala shia dak kongshir. Rahul Gandhi-i

inyakba mapa ya non-violence tangatetba aser democracy anema lir" ta BJP Nagaland-isa ashi.

Iba tatalokba ajanga Congress Party-i BJP MP tem sempaba kuli sayur. Talisa iba ajanga Congress party aser parnok lennirtemi Northeast nungi tetsürtem aser MP tem temeten magizükba aser mezüngmeshia sayur, ta parnokisa ashi.

BJP Nagaland State-i Phangnon Konyak den külemi noktaker aser yirua aliba BJP MP

ana taneptsü angutsü moatsür. Rahul Gandhi aser Congress party nungi tatok meshitsüla aser ketdangsurtem dang MP tem aser talisa tetsürtem kümzüka ayutsü ayongzüker ta BJP Nagaland-isa metetdaksü.

Tangatetba shitak aliba senso ajaki iba tatalokba aitsütsüla aser tetsürtem o MP tem amokmerenba aser mezüngmeshiba anema longjemer noktaksü ayongzüker ta Media Department, BJP Nagaland State sangdong nungsa metetdaksü.

KIBONG KÜMER KÜM 50 AJUNGER



1974



2024

Wb. I. Tako Jamir & Wt. T. Anungla Lkr. (Yaongyimsen)

Temeim oja, oba, otsü & Obou,

Nena kibong kümer tanü December 21, 2024 anogo tashi Tsüngrem taochi ket agi onok tanur terok (6) aser semchir ter(10) tashi Pa temoatsü manung anir aruba asoshi Tsüngrem tenüng asanger aser nena nema tetushi tulu agütsür. Tsüngremi ano nena nem arishi aser taküm tajung maojangma.

- Temeim Chirnur, Semchirtem & Anükapang.

Y. Patton-i Wokha Town Council office tasenba semzüktsü



Wokha Town Council indang office building tasenba aser tajungba kuma yanglushir December 20, 2024 nü semzükba mapang tangokba noksa ka nung Deputy Chief Minister Y. Patton, Deputy Commissioner Wokha, sorkar ketdangsür aser WTC züngsemtem angur.

Dimapur, Luchii/December 20 (TYO): Hokulbarnü Wokha Town Council (WTC) indang office building tasenba aser tajungba kuma yanglushir aliba semzükogo, kong Deputy Chief Minister and Minister In-charge of Home and Border Affairs, Government of Nagaland, Y. Patton alakteta jaoker ama sentong moatsü.

Patton-i iba sentong nung jembidang lokti den Christmas salem lemsatop aser elected councillor aser government nominees tem dang jila aser district nung nübur ajungtsü atema mapa inyaksü nenshia ashi.

Pai WTC züngsemtem dang Nagaland Municipal Act 2022 ya Laishiba ama kumdaktsür mapa shidak inyaksü ayongzük.

Maneni Patton-i WTC züngsemtem dang lungjemer terenlok mapa inyaksü aser state nung danga municipal councils atema tatishitsü tajung sayutsü ayongzük.

Küm 20 sülen ULB election agütsüsa Nagaland Chief Minister Neiphu Rio mangdang aliba aser bendanga agütsür inyakba atema Patton-i pelaba lemsatopa liasü aser Advisor, Urban Development & Municipal Affairs,

Government of Nagaland, Zhaleo Rio daka state nung municipal aser town councils ajunga renlokdaaktsütsü tangatetba aser mangdang aliba atema pelaba lemsatop.

WTC ajanga office tajungba kuma yanglushiba nung senotsü kanga kumdanga aser ochishia amshiba atema pai tenüngsang agütsü aser maneni jila terenlok asoshi senotsü kumdanga amshitsü ayongzük.

Alakteta jaoker Advisor to Chief Minister, Senior Vice President & Coordinator NDPP, Dr. Chumben Murry-ia iba sentong nung jembidang WTC züngsemtem dang nükla tajung yur inyaksü aser kidanger state aser district tem nungi inyakyim tajung angazüka amshitsü ajungshi.

Pai parnok dang Wokha town ya smart town kumdakja senotsü kumdanga amshitsü aser ochishia inyaksü ayongzük.

Murry-isa WTC office ya nüburtem asoshi tembar tajung ka ama aser nübur ajungai amshitetsüla, ta ashi.

Pai WTC züngsemtem dang parnok ya yimsütsüba aser sorkar indang sentong balala mapa kuma inyakba nung legislative assembly züngsem den tatongba

lir ta ashi aser Nagaland Municipal Act 2022 kanga junga meteta alitsü ayongzük.

Paisa anti-defection laws indang tekumdangtsü ashi aser akang-akanga nokdaktsü ayongzük aser maparen lungjemer inyaksü ajungshia liasü. Paisa WTC government nominees tem den tepela lemsatopa liasü.

Iba sentong nung Deputy Chairman, Wokha Town Council, Nzano P. Kikon menden liasü aser WTC Councillor Hapenthung P. Ezung-i pela agizükba o jembia liasü.

Iba sülen Chairman, Wokha Town Council, Khozano Lotha aser Additional Deputy Commissioner & Executive Officer, WTC, Renbomo Ezung nungeria o tatsütsü jembi.

Iba sentong nung Tsüngrem temoatsü jazüka Wokha Town Baptist Church deacon Yanbemo Kithan-i sarasadem aser ki tasenba meshiteta Rev. Tssopemo Ngullie-i sarasademtsü.

Sentong tembanga N. Mhao Ngullie, Councillor, WTC ajanga melepzung o jembi aser Wokha Town Baptist Church deaconess N. Thungdeno Murry-i sarasadema sentong tembang.

Deputy Commissioner Mokochung ajanga metetdaksür

Dimapur, Luchii/December 20 (TYO): Mokochung District nung Tuli Sub-Division kübok Additional Deputy Commissioner, Tuli indang Administrative Jurisdiction kübok Kangtsung Rongpang Meyiterlen Village ya yimtsüng ka ama recognition atema asüngdanga lir, ta Deputy Commissioner, Mokochung, Thsuvisie Phoiji Hokulbarnü sangdong ka nung metetdaksü.

Iba yimtsüng recognition dak sendakba nung tai aputsü

lira, iba sangdong agütsür anogo 30 tsüngta DC Office, Mokochung nung agütsütsüla, aji mesüra iba ken o nung tai apur mali ta züngshitsü aser tapet mera agütsü atema sorkar dangi yoktsü, ta sangdong ajanga ashi.

Iba alushi tasazük 1023 Area or 4139934.2 Sq mts aser arütsü ya north tsütsü Wamaken village, east tsütsü Kangtsung village, west tsütsü Kangtsung village aser south tsütsü Kangtsung village alitsü, ta ashi.

Directorate of YRS ajanga Viksit Bharat Vision Pitch ayongzük

Kohima, Luchii/December 20 (TYO): Tang Viksit Bharat Young Leaders Dialogue ta ajaba National Youth Festival 2025 nung shilem agütsü asoshi nübu shimba round tasembuba nung Kohima, Dimapur aser Peren nung aliba kaket reju balala nungi lanur 10 shilem agia liasü.

Arishi küm 15-29 tsüngta lanurtem ya mezüng round ana - Viksit Bharat Quiz aser

Essay/Blog Writing ajanger Hokulbarnü Round 3 - Viksit Bharat Vision Pitch Deck - state level presentation nung shilem agia liasü, koba Directorate of Youth Resources and Sports Nagaland nung ayongzük.

Iba mapang parnoki Viksit Bharat atema parnoki shimba onük temeja nung PowerPoint presentations agüja liasü.

(Maneni tapak 8 nung...)

Kesonyu Yhome-i KVGOA Island nung water fountain semzüktsü

Dimapur, Luchii/December 20 (TYO): Kohima Village Gazetted Officers' Association (KVGOA) Island, Chatsa, near NPSC Office, Kohima nung December 19, 2024 nü Commissioner and Secretary to Chief Minister of Nagaland, Kesonyu Yhome-i semzüktsü.

Iba project ya Pollution Control Board-i Deputy Commissioner's office, Kohima ajanga senotsü teyari agüja yanglu, aser iba Island nung nübur puatsü tesem tasen ka alitsü.

Kesonyu Yhome-i tajungshi o tatsüka jembidang iba project takok ngua inyaktetba atema tenüngsang agütsü aser Association dang civic sense adokdaktsütsü asoshi anir inyaksü ashi.

Yimti tebour junga aser müreka ayutsü atema nüburtemi shilem agütsü tongtipang lir ta paisa ashi.

Sentong nung Dr. Menuosietuo Tsiekha ajanga iba project indang report agütsüba

mapang iba fountain tiyong nung horn cups pezü lir, koba dang Hieke ta ajar, ta ashi.

Item ya yimtsüng nung Khel pezü telungjem nung aliba temaitsü lir.

Teka ya Tsüngremi yimtsüng aser Naga nung nem temoatsü agütsüba temaitsü lir, ta ashi.

Paisa iba design nung sobaliba dak sendakba temaitsütem indanga rateta ashi aser project nung shilem agirtem nem tenüngsang agüja liasü.

Iba sentong nung KGOK tir Kethosituo Sekhose, NCS menden liasü aser paisa melepzung o jembidang Association nem iba project agütsüba atema District Administration dang pelaba lemsatop.

Iba project ya taoba KGOK tir Dr. Menuosietuo Tsiekha lenisüba nung inyaka liasü.

Iba sentong nung KGOK Office bearers, Khel pezü indang unit ketdangpur aser KGOK züngsemtem dena liasü.

NDPP ajanga Dielepuü Metha asükhu lemsatop

Dimapur, Luchii/December 20 (TYO): Nationalist Democratic Progressive Party (NDPP) indang Secretary General, Abu Metha tetsü (grandmother) Dielepuü Metha asüba osang angashia kanga jashir, ta NDPP tir Chingwang Konyak ajanga sangdong ka nung ashi.

Arishi küm 100 junga aliba takum ka asünung, asür Dielepuü-i temeim sayuba, sarasadema aser Tsüngrem nem bendanga agütsüba lar chirnur aser semchir temi takok anguba nung kuli sayur.

Aseni teti meima aliba nisung dang tatem salem ashitsü ya tasak lir, saka la arishia aser jangratema liogo aser tang la Tsüngrem den lir. Tsüngremi mangyimer kibong nem maneni temulung nung anisüngzük aser tashi tasen agüjang ta sarasademtsür.

Ni aser kinungtsü den NDPP kibong-i Abu Metha aser kinunger den asükhu lemsaper. La tanüla teti tatem maka tesunep nung anisüngzükjangma, ta sangdong ajangasa ashi.



Okotso Yanthanro nung December 16, 2024 nü marketing shed cum storage facility ka semzükba mapang tangokba noksa ka nung alakteta jaoker Moaienla Pongen, Deputy District Agriculture Officer, Wokha den Agri ketdangsür aser dangartem angur.

Taoba mapang Haryana CM aser INLD Tir, Om Prakash Chautala süogo



New Delhi, December 20 (Agencies): Indian National Lok Dal (INLD) party Tir aser taoba mapang Haryana chief minister, Om Prakash Chautala Brihostibarnü Gurugram nung temelungjang tashidak agi süogo; pa arrshi küm 89 liasü.

Chautala temang nung timtem adokba sülen idangyongjisa pa hospital-i anir oa yari saka meküzükteti asü.

Chautala ya pezüben tashi Haryana nung chief minister inyaka liasü. Pa ya taoba mapang deputy prime minister Devi Lal'er jabaso lir.

Om Prakash Chautala ya 1935 küm January ita nung aso. Tebu Chaudhary Devi Lal ya India nung Deputy Prime Minister 6buba liasü aser Haryana nunga Chief Minister inyakogo.

Chautala ya tenetben tashi

MLA inyaka liasü.

Chautala mezüng 1989 küm Haryana nung Chief Minister ita trok inyak. Pa ano chief minister aküm saka ita ana dang lirbo anen. 1991 küm nunga pa Chief Minister aküm saka mapang tatsüka tsüngda state nung President's rule benoka liasü. Iba sülen 1999 nungi 2005 tashi pa term ana CM inyak.

Par party ya NDA (National Democratic Alliance) aser Third Front teloktep naprongla nung denogo. 1987 küm pa Rajya Sabha MP aküm aser 1990 tashi inyak.

Haryana nung (1999–2000 küm) junior basic teachers shimba maparen nung ochimashi liasü aser iba nungji pa densema liasü, ta aija 2013 küm pa küm 10 tepuokdak ayutsü obendang agütsü saka pa jail nung küm 9 ser tasadang dang puokba sülen 2021 küm July ita nung Tihar jail nungi chioka liasü.

Amit Shah-i jembiba o anema Dalit organisations-i longkak aiter

New Delhi, Luchii/ December 20 (Agencies): Tawa Parliament nung Union Home Minister Amit Shah-i B R Ambedkar anema jembiba anema Dalit organisations-i Brihostibar nungi tenzüka linük tesem ajaklen longkak aittsü ayongzük.

Amit Shah-i jembiba o ya linük temzüng yanglusang (Ambedkar) mezüngmeshiba o lir, ta shia NACDOR (National Confederation of Dalit and Adivasi Organisations)-i ayongzüka Brihostibar nungi tenzüka anogo 10 nü longkak aiter aser December 28 nü tembangtsü, ta NACDOR Tir, Ashok Bharti-i metetdaksü.

Dalit lenirtem- Nitin Raut, Rajendra Pal Gautam aser Jignesh Mewani nungeria Amit Shah-i jembiba o anema longkak aittsü ayongzüka liasü.

Brihostibarnü Maharashtra nunga longkak aitogo aser Hokolbar nungi tanga state tem nunga longkak ait tenzüko.

Uttar Pradesh, Bihar, Chhattisgarh, West Bengal, Madhya Pradesh, Andhra Pradesh aser Telangana, Haryana aser Punjab state tem nunga longkak aittsü ta shiogo, ta Bharti-i ashi.

Longkak aiter temi sorkari (home minister) yimjak nung tatok meshitsüla aser Parliament nunga tatok meshitsüla, kechiyong pai iba o ya Parliament nung linük temzüng onük nung o entepba mapang nung jembiba, ta Dalit nung lenirtemi metetdaksü.

“Dr Ambedkar ya fashion ka masü saka pa ya linük. Shibaisa linük mezüngmeshidir paji tashioktsür ka, aser linük ketdangsütsü atema tashioktsürtem dak temeden mali,” ta Bharti-i metetdaksü.

“Linük temzüng akhümket aser linük temzüng yanglurtem tenüng wazüka ayutsü atema NACDOR-i longkak aitba sentong pusemtsü atema ajak ayongzükogo. OBC (Other Backward Class) teloktemia longkak aitba nung shilem agitsü,” ta pai metetdaksü.

Dalit organizations-i yimtenren party tem danga longkak aitba pusemtsü ayongzük.

“Chhatrapati Shivaji indang kürakyangli raksaba mapang nung Ato kilonseri iba atemaji tatok meshi, saka Parliament nung yimjak nung Dr Ambedkar mezüngmeshisang home minister-ibo tatok memeshiteter ma? Pa (Shah) ya Ato kilonser dang nungi temaba asü?” ta Bharti-i ashi.

Bangladesh nung Hindu nunger anema inyakba tatalokba 2,200 lir

New Delhi, Luchii/ December 20 (Agencies): Hokolbarnü Ministry of External Affairs (MEA)-i, taküm Bangladesh nung Hindu nunger tem anema inyakba tatalokba 2,200 lir; talisa Sheikh Hasina-i aniba Awami League sorkar chirepba sülen Hindu nunger anema inyakba kanga bulua aküm, ta metetdaksü.

Taküm Pakistan nungbo Hindu nunger tem anema inyakba tatalokba 112 dang liasü, ta MEA-i metetdaksü.

Rajya Sabha senden nung MEA-i, India sorkari shidi ajanga Bangladesh aser Pakistan sorkar naprongla dang Hindu nunger tem kümzüksü atema inyakang, ta metetdaksüogo, ta ashi.

MEA-i sangdong ka ajanga, “Sorkari item ama tatalokba süoki ia agir aser Bangladesh sorkar den-a iba tebilemtsü lemsatepogo. Hindu nunger aser tanga minorities ajak kümzüka alitsü atema Bangladesh sorkari nungdakba telemetba agia inyaksü India-i imlar,” ta metetdaksü.

“India sorkari ketdangsartem jenjang nung nütsüng ajema alirtem anema inyakba tebilemtsü süoka jembir aser Pakistan sorkar danga yimsü nung ajemdaker marezmüktep, rara aser reshikangshi nokdangba den külemi minorities kümzüka alitsü atema inyakang ta mepishiogo. India-i

maneni alima sabang balala nunga Pakistan nung nütsüng ajema alirtemi timtem ajangshiba lemsateper,” ta MEA-i metetdaksü.

2022 küm Bangladesh nung Hindu nunger anema inyakba tatalokba 47 liasü, 2023 küm nunga item ama tatalokba 302 liasü saka 2024 küm nungbo December 8 anogo tashi nung Hindu nunger tem anema inyakba tatalokba 2,200 lir, ta MEA-isa metetdaksü.

Pakistan nung 2022 küm Hindu nunger anema inyakba tatalokba 241 liasü, 2023 küm item ama tatalokba 103 liasü aser taküm October ita tashi nung Hindu nunger tem anema inyakba tatalokba 112 liasü, ta MEA-i metetdaksü.

Sorkarisa, Bangladesh aser Pakistan na dak alaka tanüngba kiyonger linüktem nungbo Hindu nunger tem anema inyakba tatalokba kecha maliasü, ta metetdaksü.

Rajya Sabha senden nung Minister of State for External Affairs, Kirti Vardhan Singh-i tezüluba nung item osangji metetdakja liasü.

Taküm August ita nung Bangladesh nung sorkar chirepa Ato kilonser Sheikh Hasina linük nungi jena aoba sülen anogo ishika lir Nobel Peace Prize angur, Muhammad Yunus leniba nung interim sorkar tenteta lir.

NAGALAND POLICE

PUBLIC ADVISORY

Second-Hand Car Syndicates Operating in the Neighboring States of Nagaland

Nagaland Police is issuing this advisory to inform the public about the rising threat of second-hand car syndicates operating in the neighboring states of Nagaland. These syndicates have been engaging in fraudulent activities, deceiving buyers and posing serious risks to unsuspecting car buyers particularly in the border districts of Nagaland.

Modus Operandi:

- In most cases, these vehicles are fitted with GPS and upon the sale of vehicles to unsuspecting buyers, an FIR is registered and the location of the vehicles are provided to the police.
- There are cases where only a single ignition key of the vehicle is given to the buyer. As these vehicles are fitted GPS, the members of the syndicate locate the vehicle and take back the car without the knowledge of the buyer.
- The syndicates often provide falsified or forged documents for second-hand vehicles, including fake Registration Certificates (RCs), insurance papers, and ownership transfer records.

Protect Yourself:

- Verify Vehicle Documents:** Always check the authenticity of the documents with the relevant authorities such as the Regional Transport Office (RTO).
- Identity of seller:** Always insist on identity proof of the seller viz. Aadhar, PAN, etc.
- Avoid Unverifiable Sellers:** Deal only with authorized dealerships or individuals.
- Sale Deed** should always be insisted upon in the presence of at least 02 (two) witnesses.
- Payments** should be made only through online banking or other digital means so that payment history is traceable.
- As far as possible, insist on NOC from the RTO and Police station where the vehicle is registered.
- Report Suspicious Activities :** If you suspect any fraudulent activities or come across suspicious deals, immediately report it to the local Police stations.

We urge the public to be vigilant and cautious when purchasing second-hand vehicles from sellers of neighboring states or through unverified online platforms. These syndicates are exploiting the lack of awareness among buyers, and it is essential to take necessary precautions to avoid becoming a victim of such crimes. Your safety and the safety of your investment should always be a priority.

**Stay Alert.
Nagaland Police.**



TIR YIMYIM

YIMOBILEM (EDITORIAL)

DIMAPUR

KÜPTOKNÜ

LUCII 21, 2024

Asenok tarakzü majung akümer

Asenok ya asen lima nung alir saka asenok onüleni aotsü makok, asen chinütsü achitsü makok aser bendang limatem nungi aseni aginüba nübotema arutsü makoktsüsa India government-i asenok tarakzü majung ozüing tesashiba küma akangshidagi. Item rongnung tang center government-i Nagaland, Mizoram aser Manipur state-tem nung Protected Area Regime (PAR) ozüing tanaben lepa bener arua mapa küma benschitsü telemtetba agiba ya asütsü. Iba ozüing ajanga tangar bendangertemi item stata-temji semdangtsü memelar, anungji kodamasüba kanga nungdak mapa ka atema mesüra center government-i bendanger shinga nem item state-tem semdangtsü temelaba magütsütsü. Atangji, tang Manipur state nung kin o kin na tsüingda mepetmesü aliba ajanga, talisa, Myanmar len nungi bendangertem arua timtem agütsüba nokdangtsü atema PAR ozüing ya agiener aliba ano tanaben agütsüshir amai jembia sayur, saka iba kuli jagibo Nagaland nung dena bendanger aiener tajunga marutettsüsa ozüing tejen tasen küma akangshitsübaji nungdak madoker. Ano, tangatettsü kaji, Myanmar len nungi bendangertem aruagi India nung timtem agütsür süra, itemji India government dang temelaba agir aruba nübotembo masütsü, anungji itemji nokdangtsü atema PAR ozüing akangshibaji asenok asoshiho India government menja aponger atsükshishir amai lir. Parnok tebilembaji tangu dang, kechiyong PAR ozüing akangshiba jagi, talisa, anülulen aliba limatem nungi asenoki aginüba nübo asenok yaritsü purtem marutettsü. Iba jagi asenok metetmeteta tuluka nung akoksatsü. Ano, ibaji dang masü saka Myanmar aser India na tsüingda nisung shinga ajanga mesenzütettsüsa long jara agi atsüdanga ayutsü apusoba mapa ya asütsü. Iba jagibo tangar bendangertem masü saka asen kinunger aser adianutem kibokkisema mesütettsüsa akümtsü. Atangji, Naga nungersa süaka asenok Aotsür aser Aoertemibo iba timtemji majangshitsü, kechiyong Myanmar nung asen kinunger Aor yimtsüingtembo mali. Ajisüaka, Konyak nunger Longwa yim amabo ki telong atepzüng nung Myanmar aser India artsü süir aser Myanmar Naga o India Naga na yimdong tiyongtsü agidang artsüdanger lir, tetezü kiyong aser kiren dang balala saka yimti yimdongbo külem yimti yimdong ser yimtsüing ka nung Myanmar Naga nunger o India Naga nunger na alir. Kasaji, tanga Naga kintema karbo Myanmar aser India na prongla nung lir. Ajisüaka, tanü asenoki dena Myanmar Naga aser India Naga ta jembiba ya Naga nungeri memetet aser Naga nunger dang masüingdang ser pei tashi aser pei temetetba apia kasa kin aser kasa kibong ka chir rongnung tetsüingda aitdakja arr ladangtsüba ajanga atalokba mapatem lir. Iba jagi tanü tashi Naga nungerbo kasa azü agi sosemba kasa Naga nungersa ser nung, alima telongtet tejangja ka yur yimten ka kübok longjemer melitet kar Myanmar aser kar Indi nung sükshia alir. Ano, tamajungbaji India nungsa süaka Naga nunger ajak longjemer state ka mekümtet kar Nagaland nung, kar Manipur nung, kar Assam nung aser kar Arunachal Pradesh nung ta sükshia pei ali liteper. Itemji yimten ka kübok külem alushi ka nung longjema alitsü asoshi merangaka memarangtet, Naga nungerbo alima nung yimten ka kübok külemia melitettsüsa küma odaktsütsüba sentongji, tang Myanmar aser India na tsüingda long jara agi atsüdanga aoba mapa ya asütsü. Iba yagi joko asenok Myanmar nung iagi osangtajung melemsateptettsü aser parnoka asenok dangi tanü ama sadema marutettsü. Item ama asenok tarakzü majungtsüsa alenba ozüing ka khen, ka khen ta akangshi dang asenok nüchiso bushirtem India lar kümja kümadoker. Joko, asenok asen lima nung sadema oli aruli mesütettsü aser asenok dangi bendang limatem nungi sayutsüingir aser teyarirtem arutsüa memelatsü aser ano bendanger takar limatem nungi asenok yaritsü atema senotsü teyari yokba mapa aser lenmangtembo aika shibangtsüogo. Ashiko, item ya asenoki nüchiso tebusi mashi bushiba ajanga alena aliba salatsü melen salar aliba dena akangshia alenshidaktsür asütsüa akok.

OLEMSABANG

Khristmas

Mr L Ngangshi Jamir, Mokokchung Village.

Alima nung benjong tapu aika,
Chubar benjong, takar benjong,
Tashi temeter benjong, ano aika.
Item benjongtem nung-makmaiter aser tilar jenjang maka.

Saka tular tilar, takar sensaker
Tanur tain kecha telemsa makai
Ajak kasa pelatepa benjong ka lir.
Aji Khristmas.

Ibai tammang agi tesangwa, tamakok agi takok,
teimla makaba nungi teimla tasen, sensak tia nungi takar,
maksü tia nungi sentsüwangshi, tasüba nungi taküm
tatem maka tamaren jenjang lir.

Osang tajung tapu aika lir, rara nung takok anguba osang,
Mapa nung takok anguba osang,
Shisaliok nung takok anguba osang, ano aika.

Saka Khristmas osangji- osang ajak rongnung- tulutiba, tematiba
Tongtipangtiba, tajungtiba, aser tepelatiba osang lir.

Ibai kuonung manger mesangwadang ajungbena atalokba ka masü.
Putu aika agia iba maparen nem. Alemi Tsüingremi shilem aisü aser
lemang aisü nung Ain keter jenti ajanga iba indang shin.
Eden tsüki putu nungi Baptitsüba Yohan putu tashi nung-ang
ya atalok.
Tenyar Paul-i ashi ama, mapang tabensa nung, tetsür agi asoba
aser ozüing kübok asoba Tsüingremi pei chir alimai yok.
Ibai meimchir dangi Tsüingrem temeim jungkai adokba ji lir.

Yongyaseta ataba Khristmas mongpo aruogo, tesem ajaklen
Khristmas ronem menemer.
Yimti yimdong ajak sentsüpranga benjong sübo agi yangpanga lir.
Tulu tila na pelateper.
Tesüingmangtsü Tsüingrem taochi asoshi pa tenüing sangdi.

Yisuji Tsüingrem masü nungbo pai asenok meküzmüktetla.
Pa tanela nung dang aru asübo, meimchiri pa dak mekongshitetla.
Pa nisung kümer aruba agi dang asenok melena pa kangki nung
asü.

Tejen putu nung Tsüingrem talidakji süki liasü, tanü asen putu
nung Yisu Khrista Immanuel ajanga asen temangji Tsüingrem tenlaki
aküm.

Yisu aso dang Chuba aseme senpet bener semdang-
Arabia chuba Melchoiri Hon senpet bentsü.
Hon tetezü pa tatem maka chuba.
Tarsus chuba Gaspari liangmesen senpet bentsü.
Liangmesentetezü- Pa tematiba Putir.
Ethopia Chuba Balthasari teronem menemba senpet bentsü.
Teronem menemba tetezü- Pa taneptsür tulutiba.

Temeim adianu, naia kümtetdakba Yisu Yimjung Chuba chir nem
kechi senpet agütsütsü?

Hon Taribi senpet pai maginer, jabujari benjong pai maginer, Aui
agi sünggra aliba taktdang ama, memerük shisatsü agi sünga aliba
temulongjang pai maginer.

Asen dak pa alitsüsa temulongjang temerük pai aginer.

Asenok rongnung aser asenok dak Yimjung aser Tesünep tatem
makai mongdaktsütsüsa asen taküm aser tanela merüktetdi,
meshitetdi, aser Yimjung chuba chir kinü Yisu nem asen mulongjang
agütsüdi arung.

*** Iba Sangro nung meter aser beating kecha mali, azüingtsü atema
dang züluba lir.**

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Yim ka nung tribal Khristantem dang Khristmas mamongtsü tuyu



Taoba mapang Khristmas mongpu nung Chhattisgarh kübok Narayanpur nung district collector office kima Khristantemi longkak aitdang tangokba noksa nung angur.

December 20, 2024: Chhattisgarh state nung aliba yimtsüng ka nung Khristantem dang Khristmas benjung mamongtsü tuyu.

Yimdaklirtemi Khristantem dang Hindu yimsü dangi mesüra akhi lisopur yimsü dangi tanaben meyipang, ta shia amokmerenba mapang ka nung maneni Khristantem dang Khristmas mamongtsü tuyur.

November ita nung Hindu nung lakti kati Khristan ka asüpila sentong nokdang aser tribal Khristan tenet dak züka liasü.

December 18, 2024 nü osangbener den jembidang Khristantem atema ken o jembitsür kati,

“Iba ya ajanga onok melung raksar, kechiyong tesüba küm pongu tashi state nung Khristantem anema inyaka arudar,” ta metetdaksü.

Loktii Khristantem dang Hindu yimsü mesüra akhi yimsü dangi tanaben meyipang ta tuyubaji linük temzüng alema lir, ta paisa metetdaksü.

“Ano mamangtetsü kaji, sorkar ketdangsertemia ozüng alema inyaktertem ang pusemer,” ta paisa metetdaksü.

November 24 nü Bustar district kübok Dhuragaon yimdak tribal Khristan kibong 23 aser tanüngba yimdaklirtem tsüngda mangatettep adoka liasü.

Khristan, Anthi Mandavi TB tashidak agi asüba sülen lar kibongi la mangji yim adener among nung ang aremtsüsa aküm. November 25 nü Khristan kibongtemi police nem ken o agütsü saka police-i magizüki liasü.

Nütsüng 400 shi dang aliba yimtsüng nung police-i patrolling tenzüko. Ano külen Revenue department nungi ketdangser kati Khristan kibong 23 dangji, nenoki ozüng alema tribal meyong li nung ki asü, ta metetdaksü.

Yimdak tongti yimsüsür, Beeruram Baghel-ibo, yimdak

ali tsütsü mangatettep kecha mali, saka yimdaklirtemi Khristan kibongtemi tanaben Hindu yimsü dangi meyipdaksüner, ta ashi.

“Yimdaklir ajaki takümba Khristantem Khristmas benjung memongdaksütsü atema telemtetba agiogo,” ta paisa metetdaksü.

Parnoki tanaben Hindu yimsü dangi memeyipra parnok ajak yimdak nungi meindoktsü, ta paisa metetdaksü.

Raipur nung Archbishop Victor Henry Thakur-i, “Tang Bastar nung tensa ya shisabulutsüsa lir. Tang mapang ya asenok longjema alitsüla aser tamang jenjang nungi

manokshitsüla, kechiyong item teloktemi kin aser yimsü nung ajemdaker sensakertem tsüngda telemsa adokdaksütsü merangtsü,” ta metetdaksü.

Taküm January ita nungi September ita tashi nung Chhattisgarh nung Khristantem anema inyakba tatalokba 127 lir, ta United Christian Forum (UCF)-i metetdaksü.

2022 küm December ita nunga Chhattisgarh state nung Hindu nungertemi Narayanpur kübok yim 18 aser Kondagaon district kübok yim 15 nung Khristantem anema inyaka liasü.

Nütsüng million 30 aliba Chhattisgarh state nung nütsüng shilem 2 dang Khristantem lir.

2024 küm nunga India nung Khristantem anema inyakba aika liasü

December 20, 2024: India nung Khristantemi 2024 küm ya-a tamang jenjang tendangba küm ka ama bilemtetsü, kechiyong taküm Khristantem anema inyakba tatalokba aika liasü.

Taküm Khristantem anema inyakba kanga bulua aküm, talisa north len aliba state tem nung kanga tezülen aliba yimtsüngtem nung Khristantem anema inyakba tatalokba aika liasü, ta Khristan lenirtemi metetdaksü.

January ita nungi September ita tashi nung India nung Khristantem anema inyakba tatalokba 585 liasü, ta United Christian Forum (UCF)-i metetdaksü.

BJP aser Hindu teloktemi India ya Hindu linük ka kümdaksüner, yimsü meyipba anema nokdaker aser yimtsüngtem nung missionary tem mapa nokdang.

India nung nütsüng teimtiba aliba state, Uttar Pradesh ya Khristantem atema tesem tamajungba kümogo; taküm August ita nung iba state nung anti-conversion ozüng ano tesashiba benokogo, ta Khristan lenirtemi metetdaksü.

UP nung anti conversion

ozüng tasanba kübok aibelenertem taküm piyong tepuokdak ayutsü akok mesüra küm 20 tashi tepuokdak ayutsü akok.

India nung Khristantem anema inyakba tatalokba 585 nungi tatalokba 156 bo Uttar Pradesh nung liasü. Anti conversion ozüng kübok tai tonglokja Khristan aika apu aser parnok aika jail nung puoka lir.

Manipur state nung yaküm May 3 nü rara adokba sülen tang tashi lisopur Khristantem aser Meitei Hindu nungertem tsüngda maneni rarar. Khristan teloktemibo Manipur nung Khristantem anema inyakba ya BJP-i aniba sorkari pusemer, ta tai tongloksür.

2014 küm Income Tax Department-i sorkari yariba Khristan school tem nung inyaker putirtem aser nun temia pei itasen nungi saru agütsütsü lateta liasü aser taküm November 7 nü Supreme Court-i iba tetuyuba pusemba obendang agütsüogo.

Income Tax Department tetuyuba anema temepishiba ken o 93 benoka liasü saka Supreme Court-i ken otemji thinentüsügo.

ANO GO ABEN TSÜNGREM DEN

Khristan liba-liro tetenzükdak - Mathi 4: 18-25.

Meimchir temetetba nung Nazaret nunger Yisui yaribaji meimchiri rasaa ashitsüba atema yari. Asenoki Yisu indang bilembaji Talangzüker aser Kümtetdakba ta angatetba nung dang atemer. Pa aji liasü, saka ano iba dang tali.

Tanga balaka rongnung, Yisui mapang ajak nung liba-liro tesayur tulu ka liasü. Yisui tebilemba ka mesüra tangatetba ka nung dang Pa asoshi aser tanger asoshia tekong meranga mesot, Pai ajak asoshi jakla (morality) nung sot. Yisui ajaba odang lir: “Ni anidakang”. Iba tajaba nung tashi angatsü asoshi shidak bilemtsü aser shidak alitsü temeshi tebilemtetba nungdaker. Iba nung Khristan kati Khristan jakla tashi angur.

Telok nung jenjang akatsü asoshi Yisu sayuba liba-liro yimya ozüngji kija takümi amshitsüla. Alima nung rongsen meshidaki lemsatepba nung ni kechi inyaksü? Ajemrepa alirtem tsütsü Kü tebilemba kechi? Yisui “Kü sülen anidakang” ta ashiba tetezü kechi?

Item nung shisadangang: mapang agia Mathi 5:1-22 züngang. Iba liba-liro ozüng ner telok nung, ne mapa nung, ner arogo nung aser ner kidang koda amshitsü bilemdangang. Nai iba tesayuba nung alitsü meranger asü?

O Kibuba, ne lemanng Kü dang sayuang, aser ni lenten lemanng nung aniang. T.Ken 27:11

Koba lemanng nung na aotsüla iba lemanngji atema ni ne dang ashitsü aser sayutsü: Ni Kü tenük ne dak yur sayutsüngitsü. T.Ken 32:8.

1944 küm British nungertemi India tesem ajaklen shisaliok ajungketsütsü atema missionary tem dang nungi saru magitsü tuyua liasü, saka tangbo iba tetuyubaji agienogo. Tang India nung Catholic Arogoi shisaliok reju 50,000 dak tema lapoka lir aser item rongnung school aser college 400, universities trok aser medical schools trok densema lir.

Ano taoksatsü osang kaji, November 18 nü Tamil Nadu nung Madras High Court-i India nung Hindu aser Muslim nunger kiojen ketdangtsütsü atema ozüng benoka aliba ama Arogo kiojen ketdangtsütsü atema-a ozüng ka latettsüla, ta benoka liasü.

Church of South India (CSI)-i ketdangtsüba Arogo kiojen nung ochimashi mapatem inyakba ken o angadangba mapang nung Madras Hingh Court-i ibaji benoka liasü.

1947 küm India nunger nüchiso anguba sülen Protestant denomination-i Anglican Arogo kiojen kiojenji market value dang nungi jenjang ishibai ayok, ta tai

tonglokja lir. Iba dak alia Arogo telung nung mangatettep aser ochimashi lir ta tai tonglokja lir.

India nung Khristantemi item ama timtem balala ajangshiyonga osang tajung kaji, tawa Pope Francis-i Kerala nungi George Jacob Koovakad cardinal shima liasü. Taküm India tesem balala nung tzümetsüng aser anentsüh ama alima tzi-mopung lendong balala nung Arogoi timtemertem yaria aruogo.

Kerala nung Arogo lenirtemi Caritas India teyari agia Wayanad district nung anentsüh lendong agi kongshirtem atema ki 100 sütsütsü nangzüka liasü. Taküm July 30 nü iba lendong nung nisung 400 dak tali asü aser nisung 200 shi samaa liasü.

Uttarakhand state nunga tzünglu dak sendakba lendong balala nung nisung 17 asü aser nisung 3,500 prokshia liasü. Himachal Pradesh nung tzümetsüng lendong aser taküm June ita nung Assam nunga tzümetsüng lendong atalokba mapang nunga Arogoi Caritas India teyari agia lendong agi kongshirtem nem chiyungtsü takong, süki, süoshi aser merükmejuba osettem agüja liasü.

AO OSHI ANGAZÜKDAK: TANÜ ANGAZÜKTSÜBA OJANG



Tatongi

- (v) tareni, mezütoki ka sülen ka (serially)
- * Kententsü purtem ajak tatongi sabangi tur aten.

Tatongren

- (adj) tarensen, kin kidong jakzüka arubaren (generational lineage)
- * Senso shiai pei kin kidong tatongren meteta alitsüla.

OLONG PAITEP # 7017

	1	2						3	
4									
5							6		
7							8		
9	10				11			12	13
14				15					
	16								

TIPIEN :

- Ajem-ajemer - (9)
- Kanga tapet - (7)
- Tsüngküm ozü ka - (3)
- Tzünglu tongdangba - (6)
- Anüing nungi tsükba - (3)
- Anüing nung yimzüba - (3)
- Lenmang süitepdak - (6)
- Anüingdang tesangwa - (3)
- Shisatsü tamajung - (7)
- Tiyazü jembia tangar ashioktsüba - (9)

LANGTSÜNGLEN :

- An-i akoba - (5)
- Aonsotsü tashi ka - (5)
- Temolungjang nung miima meyu-i ashi - (4)
- Kunemkushi / Jakla ait - (5)
- Nisunger yimya / inyaksangshi - (5)
- Mali - (4)

OLONG PAITEP # 7016 TELANGZÜBA

TIPIEN :

- Kasa, 6. Rangben, 7. Mait, 9. Poktet, 11. Ati, 13. Atasa, 16. Rür, 17. Rajang, 20. Lanu, 24. Nüingjem, 25. Süra.

LANGTSÜNGLEN :

- Khu, 2. Süjak, 3. Onük, 4. Oba, 5. Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Taju, 21. Ano, 22. Onü, 23. Kua.

NAI-A YA METETTER MA



Turkish Airlines-i "Most Countries Flown to by an Airline" atema Guinness World Record ka nguogo. Santiago nung Arturo Merino Benítez International Airport nung iba otsü tasen yangluba kulikaket agüja liasü.

Iba tayimtsü lenmang tasen ajanga Turkish Airlines-i linük 131 nung network lir aser taoba küm ka tsüingda active routes 120 bendenlok ta Guinness World Records-i metetdaksü.



Yisu Khrista asoba osang tajung jeli sangdonga jajaba sentong nung ya Dimapur nung alir ajak arua shilem agitsü jaoker. Iba sentong tali topur jungdakja pelateptsü asoshi nisung ajaki Christmas korang semer arua iba sentong nung shilem agitsü mepishir.

Featuring

MERANGKONG MARCHING BAND

STRETCH:

DABA Church premise to Clock Tower via Notun Bosti and back.

23 | DEC | 2024

STARTING FROM 6:00 AM

Organised By

MERANGKONG SENSO TELONGJEM DIMAPUR

Special Request: Please bear with us for partial disruption of vehicular traffic



Mizoram-i stamp duties & land registration fees nung Rs 8 Crore aazük

Aizawl, December 20, 2024

(Agencies): Mizoram sorkari tan financial year tsüingda stamp duties aser land registration fees nungi Rs 8 crore tema nguogo.

Chief Minister Lalduhoma menden ser senden ka amending Land Revenue and Settlement, and Food, Civil Supplies and Consumers Affairs (FCS&CA) departments, revenue secretary Vanlalmawia-i iba osang lemsatep.

Taküm November ita tashi department-i Stamp & registrations fees nung Rs 8.58 crore tema aazük ta pai ashi.

Taküm February ita state

assembly nung 'The Indian Stamp (Mizoram Amendment) Bill, 2024' agizüka liasü aser iba ya stamp duty 1% nungi 3% ajungkettsü atema lir.

Iba nung stamp duty ya ali mesüra kimung, bank mortgages aser gifts aliba indang ashir ta Land Revenue and Settlement Minister B Lalchhanzova-i ashi.

Sorkarisa Mizoram nung revenue court ka amenoktsü lenmang bushir ta Vanlalmawia-isa ashi.

Aizawl Municipal Corporation (AMC) area dak alia taruba financial year nungi district ajak nung online tax

payment system tenzüksü ta paisa ashi.

2022 nung AMC area nung online tax payment system tenzüka liasü.

Revenue department-i Record of Rights (RoR) ta ser ownership dena land parcel indang legal document ka renemdar aser iba yagi Land Settlement Certificate (LSC) melentsü ta ketdangsür kati ashi.

Records of Rights 3,59,331 tashi computerized süogo digitally signed property cards 1,155 den Lan Parcel Identification Number (ULPIN) 94,154 agütsüogo ta paisa shisem.

2025 nung Meghalaya nung Harijan Colony belentsü lemtet agitsü

Shillong, December 20, 2024

(Agencies): Shillong nung Harijan Colony nungi Them Iew Mawlong tashi kibong 342 belentsüba lemtet 2025 nung angatetteptsü.

Meghalaya sorkari Centre sorkar aser defence

ketdangsürtem den defence land belentsü indang jembidar ta Deputy Chief Minister Sniawbhalang Dhar-i ashi.

Defence land ken o merenemtetra state sorkari blueprint ka renema lir. Iba lemtet ya taküm masü 2025 nung

agitsü ta Minister Dhar-isa ashi.

Meghalaya Chief Minister Conrad K Sangma-i Union Defence Minister Rajnath Singh den kibongtem belentsü atema defence land amshitsü shiogo ta tan ita tetenzüklen Deputy CM Dhar-i shia liasü.

Assam nung Dima Hasao indang coffee table book adok

Guwahati, December 20, 2024

(Agencies): Dima Hasao Forest Division (West) aser Assam nung biodiversity conservation organization Aaranyak tsüingda yaritepa "Dima Hasao: Explore the Wonders of Nature" ta ser coffee table book ka adokogo.

Iba kaket ya tang mezüing adoker aser Assam kübok Dima

Hasao district nung alima tobur ajung aser takar sayur,

Iba kaket ya Dr. M. Firoz Ahmed, Tuhin Langthasa, aser Dr. Dipankar Lahkar nungeri zülü.

Iba kaket nungsa Dr. Anwaruddin Choudhury, Dr. Sarbojit Thaoson, Dr. Ron Kemprai, aser Dr. Monsoon Jyoti Gogoi nungeri yaritep aser

photographers 50-i Dima Hasao tobur ajungba noksatem agia lir.

Editorial board nungsa Dr. Anwaruddin Choudhury, Dr. Bibhab Kumar Talukdar, Bijay Sankar Bora, aser Jayanta Kumar Pathak nunger dena lir.

December 13, 2024 nü Umrangso nung Falcon Festival amongdang coffee table book sayaogo.

Malaysia-i samar aliba MH370 tayimtsü maneni bushitsü

Kuala Lumpur, Luchii/December 20 (Agencies): Malaysia Airlines Flight MH370 samar küm 10 dak tema sülen Malaysia indang sorkari iba tayimtsü maneni bushi tenzüksü principle nung agizükogo ta iba linük indang transport minister-i sangdong, koba alima nung tayimtsü samaba rongnung tulutiba ka ta züngshir.

Indian Ocean south tsütsü tesem tasen ka nung bushitsü atema United States nung amenoka aliba exploration company Ocean Infinity nungi asüngdang, aser kasa company yagi iba tayimtsü bushiba maparen timba inyaka 2018 nung tembang, ta Anthony Loke-i Hokulbarnü ashi.

“Ocean Infinity ajanga bushitsü atema benokba ya tajung aser inyaksü junger. Iba tayimtsü nung samaba kinunger dang sentsüh tulu lir. Tangbo ajungtsü amai imlar aser tayimtsü teraksa ngua kinunger nem osang

tatembang agütsütsü imlar,” ta Loke-i osangbener dang ashi. Flight MH370 ya Boeing 777 liasü, kong passenger 227 aser tayimtsü ketdangsür 12 mener Kuala Lumpur nungi Beijing-i aodang March 8, 2014 nü len tom nung sama.

Ocean Infinity ajanga tayimtsü teraksa tejangja ngutetra parnok nem sen \$70 million agütsütsü, ta Loke-i ashi.

Mezüngbo Malaysian bushisüngdang temi tayimtsü ya asaa lenmang tesü leni anir ao ta meshitettsü ta shia liasü.

Ammang agi sangwa kuma jajaba tayimtsü ya ayamesor ghonda ka majungdang osangtsüsang agiba systems shibang ta bushisüngdang temi taoba mapang nguteta liasü. Military radar nung iba tayimtsü ya Malaysia leni meyip aser Penang asetkong len longer Sumatra north tsütsü ao ta bushitet.

(Maneni tapak 8 nung...)

Pakistan-i US nung maktettsüsa missiles yanglur: US

Washington, Luchii/December 20 (Agencies): Brehostibarnü White House nung ketdangsür kati ashiba agi, nuclear nok-nü aliba Pakistan-i South Asia alema oa maktettsüsa tashi aliba long-range ballistic missile capabilities yanglutar aser ibaji United States asoshi tebilemstü tasen lir.

Deputy National Security Adviser Jon Finer-i aoksa iba osang temai adoktsüba ajanga 2021 kümAfghanistan nungi US sepaitem ainshiba sülen Washington aser Islamabad tsüngta tesendaktep mejungi akumba sayur.

Iba ya ajanga Pakistan-i 1947 sülen rara tulu asem nung tamakok ajurua aliba India linük den tokteptsü nükjidong nung nuclear weapons aser ballistic missile programs mapang talangka nungi amshia aruba melenshir asü ta tasüngdangba kar arur.

Carnegie Endowment for International Peace nung jembidang, Pakistan-i long-range ballistic missile systems nungi rocket motors kanga agi tuluba tendangtetsüsa missile technology tajungba yanglutsü meranger, ta Finer-i ashi.

Item yimyaji maneni inyakra, Pakistan-i United States densema South Asia alema oa targets nung amaktsü tashi alitsü, ta Finer-i ashi.

US homeland tongtetsüsa missiles aliba linük ya ishika dang lir aser parnoki rara menaner ta pai ashi aser Russia, North Korea aser China linüktem tenüng tetshi.

“Anungji Pakistan

inyaksangshi ya United States asoshi tebilemstü tasen ka ama züngshitsü mamanger,” ta Finer-i ashi.

Pakistan indang ballistic missile development program dak sendakba nung Washington-i tenokdangba/sanctions tasen agütsür anogo ka lir pai iba o ya ashi. US-i tenokdangba agütsüba nungya Pakistan sorkar meyong defense agency densema lir, kobai iba sentong ketdangsür.

Pakistan embassy nungi telangzüba kecha agüja mali, saka Islamabad-i par indang nuclear nok-nü aser ballistic missile programs tem ya India-i tashiyim amshiba anema aser region nung tashi ita alitsü nükjidong nung lir ta ashir.

US ketdangsür anati Pakistan indang missile program ya US asoshi mapang talangka nungi tebilemstü liasü aser rocket engines tulu yangluba nungi tali tebilemstü akar ta ashi.

Finer-i jembiba ya Pakistan ketdangsür dang parnoki kechiba mapang ka yanglutsü memulungba rocket engines tashi taitba yanglur ta telangzüba agütsüdadtsütsü tebilemstü nung lir, ta ketdangsür ana yagi ashi.

“Parnoki asen tebilemstü mezüngshir. Asenoki bendanga amshir ta parnoki ashir. US-i par missile program nung tenokdangba agütsüba ya India nungi par kumzüka alitsü tashi alena ayutsü tebilemstü nung lir ta Pakistan ketdangsür temi tai nung tenüng asener, ta US ketdangsür tanabubai ashi.

(Maneni tapak 8 nung...)

Ukraine rara atema Trump den atsü-anem akatsü renema lir: Putin



Moscow, Luchii/December 20 (Agencies): Ukraine rara tatem kati arutsü atema US tir inyaksü shima alisang Donald Trump den atsü-anem kaa jembitsü renema lir aser Ukraine ketdangsür den jembishinü tenzüksü atema ‘conditions’ mali, ta Russia Tir Vladimir Putin-i Brehostibarnü ashi.

Tetsüngtai ia tezüngzüktep yanglur takotet ta pa sasa jembisang aser 1987 küm “Trump: the Art of the Deal” kaket zülusang Trump-i yakta iba rara tatem kati arudaktsütsü nangzüka lir saka pai yangji

takok angutsü atema sentong tejangja kecha agüja mali.

Küm shia inyakba ama Russia nunger den state TV nung tasüngdangbatem langzüba mapang US news channel ka atema osangbener dang Trump ajurutsü renema lir ta Putin-i ashi.

Pai Trump dangi kechi bener oa jembitsü ta asüngdang dang, Russia tashi mait jenjang nung lir ta bilema aliba samaja, 2022 küm Ukraine telungi sepaitem yoktsü totuyuba agütsüba sülen Russia kanga agi tashi taitba lir, ta Putin-i langzü.

“Tangatettep kati arutsü

aser atsü-anem akatsü asenok renema lir ta asenoki teti ashir,” ta Putin-i ashi aser Russian sepaitem tesem ajungalen takok nguyonga aor aser Ukraine nung par nükjidong ataloktsü anasai aor ta ashi.

“Kobi melie raranüa aliba Ukraine nunger malitsü, kobi melie raraner shinga malitsü. Asenok renema lir, saka tangatettep kati arua jembishinütsü aser atsü-anem akatsü atema külenjia renema alitsü nüngdaker.”

Ukraine den jembishinü tenzüksü atema Russia-i ‘condition’ kecha menüngdak aser Tir Volodymyr Zelenskyy densema nisung mashi den jembishinütsü renema lir, ta Putin-i Brehostibarnü ashi.

Ajisüaka kechi tezüngzüktep yangludir Ukraine indang tejangja ketdangsür den yanglutsüla, aser iba atema Kremlin-i Ukrainian parliament ya dang tejangja amai züngshir.

(Maneni tapak 8 nung...)



NO.FIN/GEN/CMMFI/9/2014 Dated Kohima 20th December 2024.
SPECIAL DRIVE FOR ENTREPRENEURSHIP DEVELOPMENT
COORDINATED BY
CMMFI FACILITATION CELL, GOVERNMENT OF NAGALAND

Applications are now open for aspiring beneficiaries to apply for business and entrepreneurship development loans for the financial year 2024-25. This credit facilitation program is part of a special targeted initiative aimed at supporting key sectors of Nagaland’s economy.

1. Loans under CMMFI:

Sl.No	Type of activities	Special benefits under CMMFI
1	Food trucks (Highway food trucks, fast food trucks, Eatery Wagon on wheletc) - For aspiring beneficiaries interested in starting their own food truck businesses.	<ul style="list-style-type: none"> Loans upto 15 Lakh with 30% subsidy. Subsidy is back ended and credited to loan account after 2 years of routine repayment of loan Loan repayment period 5 years. 6 month moratorium to enable beneficiaries to generate livelihood before starting the loan repayment. 6 months interest subvention. Government Servants, PMEGP beneficiaries and candidates who have defaulted loans earlier are not eligible. <p>*Only Facilitation is provided by CMMFI Facilitation cell and loans are screened and approved by District Level Monitoring and Implementation Committee.</p>
2	Sports infrastructure - For aspiring beneficiaries looking to establish business ventures centred around sporting activities, such as futsal turfs, badminton stadiums, and similar facilities.	
3	School vans - For aspiring beneficiaries interested in providing safe school transportation services. Available vehicle options include MarutiEeco, Tata Winger, Force Traveller, Mahindra Supro School Van, and more.	
4	Enterprise relating to music & fashion - For aspiring beneficiaries looking to establish enterprises in music and fashion, such as music schools, recording studios, sound engineering services, and related ventures.	
5	Establishment of Event management services	
6	Establishment of Kids Day care centres	
7	Piggery Breeding Farm – Promoting scientific breeding methods for sustainable and efficient livestock production.	
8	Floriculture – Encouraging the cultivation of flowers using modern techniques for sustainable income and market growth.	
9	Establishment of White Label ATMs – To encourage establishment entrepreneurship oriented establishment of White label ATMs at unbanked blocks and locations that need additional ATM facilities (through vendors like Hitachi Payment Service functioningat Dimapur and Tata Indicashhaving comprehensive ATM solutions)	

Refer to <https://credit.nagaland.gov.in> for more information.
 CMMFI detailed booklet can be accessed at https://credit.nagaland.gov.in/docs/CMMFI_2.0_booklet_compressed.pdf

2. Special Credit linked subsidy scheme of SCST Hub:

Sl.No	Type of activities	Special benefits under CMMFI
1	Procurement of ambulance by private hospitals (1 or more ambulance within a maximum cap of ₹1Cr)	<ul style="list-style-type: none"> 25% subsidy for loans upto ₹1Cr. Back ended subsidy. Subsidy to be processed by National SCST Hub based on application submitted by beneficiary through bank. Subsidy shall be credited to beneficiary only after successful repayment of loan for the first 3 years. This subsidy cannot be clubbed with any other schemes/subsidies of Government of Nagaland or Government of India. Other relevant conditions as per the Scheme. <p>**Only facilitation is provided by the CMMFI Facilitation Cell and final decision on the subsidy shall be that of national SC/ST Hub.</p>
2	Procurement of school bus by private schools/colleges (1 or more with a maximum cap of ₹1Cr)	
3	Procurement of Trucks and dumper trucksby existing business owners/new beneficiaries (1 or more with a maximum cap of ₹1Cr)	
4	Procurement of earth movers (1 or more with a maximum cap of ₹1Cr)	
5	Procurement of buses for passenger services (1 or more with a maximum cap of ₹1Cr)	
6	Procurement of Tractors for leasing	
7	Construction of revenue generation linked recreational centres - auditoriums etc (1 or more with a maximum cap of ₹1Cr)	
8	Other activities categorized as MSME which not specifically restricted under the scheme	

Refer - <https://www.scsthub.in/content/special-credit-linked-capital-subsidy-scheme>

Apply for your loans through <https://credit.nagaland.gov.in> or reach out to 9436030303/9077175990 for more information and end to end facilitation.

ALI AYOKER

FOOTHILL LEMANG ANASA VIHOKHU NUNG ALI LEPSA-A AYOKER.
 TALITSÜ KIMONG ATEMA TAJUNG ANUNGI TALINUR TEMI
 IBA NUMBER NUNG CONTACT SÜANG. SQFT. NUNG 80/-
 DIRECT CONTACT : 6009530632 / 6009094225

PSG goalkeeper Donnarumma tejak nung 10 ben ar

Paris, Luchii/December 20 (Agencies): Hopta tetenzüklen League 1 nung Monaco den asayaba mapang PSG goalkeeper Gianluigi Donnarumma tejak nung kanga sashia yirua liasü.

Iba asaya nung Monaco indang defender Wilfried Singo tena ball agi raktepang Donnarumma tejak nung ajem. Ivorian nungba nem iba tatalokba atema temerenshi kecha magütsü. Tena kanga sashia tsüktepba atema Singo nem temerenshi magütsüba atema half-time nung Donnarumma-i referee Francois Letexier den asatapa liasü.

Asaya tenzüker minute 22 buba nung iba lendong ya atalok aser Donnarumma ya asayadak tesem nungi anir tokotsüsa akum. RMC Sport ajanga

sangdong ka nung Donnarumma tejak nung zübu nembangtsü atema 10 ben artsüsa akum ta ashi.

Asaya tener Singo-i Donnarumma dang tatok meshi aser “Ni asaa inyakba masü saka pa tejak nung kanga sashia yiruba ni nguogo,” ta ashi.

Ligue 1 asaya sülen Singo aser Donnarumma na ajurutepa liasü aser Italy nungba ya par PSG teammates tem den Paris-i meyipa ao ta ashir.

PSG ajanga Donnarumma yiruba indang osang ka lemsatepba nung par goalkeeper “facial trauma” den zübu ishika liasü, ta ashi. Pa medical examinations agütsü aser anogo ishika masayatetsü, ta PSG indang website nung shia liasü.

Iba tatalokba sülen

Donnarumma melen Matvey Safonov asayadaksü. Donnarumma meliaka iba asaya nung PSG yagi 4-2 agi Monaco madak takok ngua liasü.

Iba asaya nung PSG nungi Ousmane Dembele, Desire Doue aser Goncalo Ramos nungeri goal ka-ka agütsü.

Ligue 1 standings nung PSG ya tematiba jenjang nung lir aser parnok ya tanabuba jenjang nung Marseille aser tasembuba jenjang nung Monaco dang points 10 agi temaba nung lir.

Donnarumma ya French Cup nung PSG-i Honibarnü Lens den asayadang shilem magitetsü.

PSG goalkeeper Gianluigi Donnarumma tejak nung Monaco indang defender Wilfried Singo-i ajemba noksa nung angur.

Mumbai City FC U13 squad atema Assam nungi jakzüker Dishant shimogo



Dishant Borthakur ya Mumbai City FC U13 squad nung asayatsü.

Guwahati, Luchii/December 20 (Agencies): Assam nungi jakzüker arishi küm 12 tain Dishant Borthakur ya nungtugu Mumbai City FC U13 squad nung asayatsü maongka ajangzükogo. Mumbai City FC ya India nung football clubs tajungtem rongnung ka lir.

Lanuwa nungi saisapong kanga jangrasang Dishant ya arishi küm pongu asüadang nungi football asaya intet.

Pa dak temulungtetba tulu aliba den sempet tajung aliba ajanga football nung kisüng masü saka cricket aser tennis junga asayateter.

Abelen kayim batsman ka ama Dishant-i cricket kanga junga asayar aser tennis nunga pai intercity asayamung nung award aika nguteta lir.

Football nung Dishant ya left-footed right winger ama kanga junga asayar.

Pa indang technical gameplay, ball junga amshitetba aser temang

azüoktetba ajanga pa asayar balaka lir.

Dishant ya Soccerstarz Football Club nung testüba küm ana training agia aru aser pa indang school coach-ia kanga yarir.

Pa ya joko Mumbai City FC tenüng nung I-League aser Mumbai Football Association (MFA) matches balala nung shilem agütsü.

Dishant ya class 7 nung azünger aser pa ya ano advanced-level pianist ka lir.

Mumbai kübok Goregaon nungi Saurav Borthakur aser Trishna Goswami na jabaso tambosang Dishant tetsü-tebou nunger ya Assam yimtiba Guwahati kübok Geetnagar nungi lir.

Dishant tebu Divyaan ya football asayatsü kanga jangrar aser teti sülen anidaksü imlar.

Dishant takok ya pa takum nung alizüng ka tongtetba kisüng masü saka Assam asoshi konang alitsü.

BENDANGLI OSANG :

Tapak 7 nungi...

Ukraine rara atema Trump den atsü-anem akatsü...

Zelensky indang kümsük ya taküm küm tetenzüklen tembangtsü liasü, saka martial law mechi atsülang aser tezüngzüktep mashi nung meyongnem agütsütsü asoshi pa tejangja ta Moscow-i züngshitsü atema tanaben election nung takok angutsüla, ta Putin-i ashi.

Kyiv den khen atema rara anena atsü asoshi mulungteptsü majung, ta Putin-i ashi aser Ukraine den teti atema yimjung tezüngzüktep nungdaker, ta ashi.

Russia-i 2022 küm nungi

Ukraine amakba ajanga nisung meyirijang aika süogo, million aika pei ki yutsür tesem balala nung prokshia lir aser 1962 Cuban Missile Crisis sülen Moscow aser West tsüngta tesendaktep nung timtem tulutiba tenzüker.

Russia-i iba rara ya NATO anüdoklen ulushia aoba anendaksütsü mechi ‘defensive special military operation’ ka lir ta ashir aser parnoki Ukraine nunger lushi shilem pongu shi agiogo aser taküma par litsü square kilometres meyirijang aika agia liasü.

Ukraine nunger region pezü

Russia nung dendaksütsü temulungtetba nung Moscow sepaitemi anüdoklen yimtsüng aika agiogo aser tangbo Pokrovsk ama tongtipang yimitem amokmerener, koba lenmang aser rail tsütsü tongtipang yimti ka lir.

Rara ya tepenja lir, anungji asen jakdang kechi aliar aji bilemstü tasak aser menüngdak, saka asenok tejakleni otar, aser iba special military operation tenzükdang asenoki renemba ama asen teinyaktsü tebetet leni otar, ta Putin-i ashi.

Malaysia-i samar aliba MH370 tayimtsü maneni...

Iba tayimtsü samaba sülen linük 26 shi lungjemer bushia liasü saka kecha mongutet.

Hopta ishika lir Malaysia sorkari MH370 ya totzü merongma tashi ayim aser Beijing nungi kilometres meyirijang aika pilar southern Indian Ocean tarok nung tembang ta sangdong.

Tayimtsü teraksa kar Africa aser Indian Ocean nung asetkong kar indang tzükum

nung bongteta liasü aser aji MH370 indang südi ta kar jangjatet aser amanger.

Kinunger temi Malaysian Airlines, Boeing, tayimtsü engine yanglur Rolls-Royce aser Allianz insurance group dang temelen sen meshia arur.

Malaysia-i 2018 küm Indian Ocean south tsütsü iba tayimtsü bushitsü atema Ocean Infinity amshi aser tayimtsü ya ngutetra sen \$70 million agütsütsü

nantzüker, saka anaben bushir mongutet.

Iba sülen Inmarsat satellite aser tayimtsü tsüngta automatic connections indang data nung ajemdaker Malaysia, Australia aser China linük temi Indian Ocean south tsütsü tzüyim tasazük 120,000sq km (46,332sq mile) telung nung iba tayimtsü bushia liasü, kong linük 150 nungi nisung balala mena liasü.

Pakistan-i US nung maktettsüsa missiles...

Ni densema US ketdangsur temi Pakistan ketdangsur dang missile program atema aiben tebilemstü lemsatepogo, saka telangzüba tajung mali, ta Finer-i ashi.

Counter-terrorism aser security terenlok atema Washington aser Islamabad mapang talangka külemi inyaka aru, ta pai ashi.

“Anungji Pakistan-i kechiba asenok anema amshitsü tashi yanglutsü ajungmesor ta tasüngdangba arur.”

Pakistan asoshi mapang talangka nungi tsükchir süa aruba India den US Tir Joe Biden-i tesendaktep tajung yangluba nung Islamabad

mepelar aser China den tesendaktep tajung yanglu. Islamabad indang ballistic missile program atema teyari agütsüba asoshi US-i Chinese entities kar nem tenokdangba agüja lir.

India-i mezüngbuba nuclear nok-nü tendanger küm 20 dak tema sülen Islamabad-i 1998 küm mezüngbuba nuclear weapons tendanga liasü aser nuclear warheads inoka amshitsüsa ballistic missiles tem maneni yanglur.

Pakistan nung iba amala warheads 170 shi lir ta Bulletin of the American Scientists research organization ajanga asadangteta lir.

US aser Pakistan tsüngta

tesendaktep ya temli-salali ta arur aser Cold War mapanga Soviet-i 1979-89 mapang Afghanistan amokbangdang parnoki Afghan rebels tem yaria liasü.

United States nung September 11, 2001 nung amakba sülen US-i al Qaeda anema raradang Pakistan ya US asoshi tongtipang tembar ka liasü aser 2004 nungi non-NATO ally tongtipang ka amai aru.

Saka Pakistan mitkari tashiyim amshia sorkar atsüngdokba, Taliban-i 1996-2001 tsüngta yimsü asüba nung yariba aser par nuclear weapons program mechi tesendaktep mejungi akum.

STATE OSANG :

Tapak 2 nungi...

Directorate of YRS ajanga Viksit Bharat...

Iba sentong nung jembidang, National Youth Festival nükjiding ya linük nung lanur lenirtem jangjatetsü asoshi lir, ta Director, Youth Resources and Sports, Kethosituo Sekhose-i ashi.

Lanur aika sobaliba ken, tsüngsang, kenten-menü aser danga maparen nung kanga tajung lir saka sorkari ano pei tebilemba lemsatepa zülutsü jangrar nem maongka agütsüner, ta pai ashi.

State nungi shimba lanurtem ya national level nunga shimtsü teimla lir ta pai ashi.

Iba sentong nung Youth Resources Officer Naroenla-i state championship indang tongmelang agi rasaa ashi aser teshimtet kaketshir temi state tenüng nung January 11 & 12, 2025 anogotem National Youth Festival nung shilem ka ama Viksit Bharat Young Leaders Dialogue nung shilem agütsü ta metetdaksü.

Iba sentong nung parnoki Ato Kilonser Narendra Modi den sensaksemstü asoshi maongka angutsü, ta lai ashi.

Iba sentong nung YRS Deputy Director Jakedovo Chase-a dena liasü.

BILEMDANGANG

“Mezüngbuba rongsenji temang anema aliba ya lir.”